

民國九年

文苑



文苑

醫藥學報社同人撰

同社吉生裘慶元輯

惜分陰軒醫案序

董天吉

醫雖小道司命係焉至聖引南人無恒之旨其義精矣矧常疾易治奇恙難療苟非研究有素曷能得其奧旨哉予友周君鎮初字小農後號伯華（因與針科同名氏復用初字）乃莘農先生之哲嗣也莘農先生古道可風時行方便嘗印治家格言繹義贈人暨編易簡方集驗方等書行世因君幼時多病憶范文正不爲良相必爲良醫之語於是命師同郡張聿青張公談經演脈循循善誘侍側多年所造深微畢業後就廣益善院義務甬董周禹庭遇有內症重候必引至君案旁雖酷暑嚴寒審

症察脈書案立方且例必留稿十餘年貧病受惠不少未幾四明位中亦延之滬北醫會且爲君位置一席矣清季余從薛逸山師游開業後亦同堂贈診得與君朝夕追從獲益良多道義之交金蘭不渝是時端午橋督兩江考試醫科意爲滬上醫士林立必蟬聯其政於是請師擬君與君互相作論預備與試不意無形中止君以所作方論投入醫報而仍精進不懈己酉夏上海警署聘君爲醫員一時道縣皆耳其名見君才高學博治病多驗均推重之光復後淡於名利辭職歸里常曰贈診給藥吾廬可備自咎昔之徇外爲人錄驗尠存予亦先已回籍數年知交一旦闊別兩地參商音問漸疏去臘閱君所著惜分陰軒醫案深飲其審病求本無微不至立方切當屢起重症苟能繼續編輯足以啓迪後學自頃世風日新用夷變夏趨功利者漸將五千餘年黃帝遺訓棄置不道良可慨已余謂非舊學之不良實由醫家之不精如醫宗金鑑有青腿牙疳夏子益書有截腸奇方儻能博覽羣書精求實驗豈不有

加勝於西醫者乎今君之艱難持恒可以風世長君逢儒已傳其業惟願專心一志立德立功將來聲宣可滿赤縣並望海內有志中學者觀摩而興起焉是爲序

中華民國八年夏月愚弟鎮海董天吉元龍氏識於團橋杏林書室

集驗方續編自序

周莘農

余前輯易簡方集驗方丙辰歲紹興醫藥學報社採入醫藥叢書第一集刊印行世繼思近世新驗方浩如烟海非一卷方書所能盡備者乃於民國三年起留心選輯並登各報以徵求承海內諸君不棄選驗寄下積數年珍集成帙矣乃甄別盡善者錄爲一卷卽斯編是也近日新病爲前編所未備如急救吞燐火鎗水等毒方較前編爲略全付刊之舉事不容緩其中有他人已驗之方藥品稍戾乎正者或馳書商榷或去霸存純雖在外省必詢謀僉同而後已如藥品此地所有而他省所無方雖佳不錄也編書之難慎如是然人之體質方地異宜不能概論用之得當則效如影

響不當受患亦深則有方與病合治驗不應者非方不驗實與人之體質有宜有不
宜也海內醫學家當不河漢斯言聊誌緣起以告閱者俾知審慎云爾

民國八年歲次己未春仲無錫周憬莘農謹序

惜分陰軒醫案卷三達情

周小農

惜分陰軒醫案由紹興醫藥學報社刊入叢書已出二冊均述一己經歷之症今戊
午之臘將盡回溯一載之內治驗重症若干人此吾儕應當自省昉曾氏修身之學
也近年診案令兒輩錄存檢閱之下不禁有感焉余自離滬回籍甘居淡泊前在醫
院供職紛繁情景猶昨枉道治人證多不暇自集今則退思補過診視之餘卽掇管
編列足以省察而徵得失乃夷考簡冊病者就診不無羈競之心其信任力之堅脆
愈否樞紐系之而病則異古所傳錫邑水多土弱患症濕熱居多卽以伏暑論更較
他處爲難治狃於治濕不顧清熱此舊家之故智鴻烈解云暑氣多天寒氣多壽漢

張仲聖每嘆傷寒難治。輒近乃屬溫暑。矧兼內傷爲多乎。且貧富不同。治東璧氏所謂高粱藜藿腸胃天淵。洵有得之言也。彼葉吳二氏之治溫退熱存陰他家或以爲非余閱歷所及。知其有不盡然者。不兼濕食痰濁素體津血不足。則持根本療法。轉能愈病。若不徇成方而務求博引。易招外訾。猶之香巖氏謂徐某方雜而不知其實。脫胎於外臺也。論雜症之中如脚氣之恙。多由濱海卑下脛腫。乃成前賢發明釀因最爲的確。其致命乃濕毒衝心。歐西棄精求粗。歸咎米毒。不其僣乎。馴至病劇。易診令舍麥食。必詳喻數四。始就範圍。由其中先入之見也。至漫熱似勞症。由感冒或脾熱濁濕。儻或誤補貽害。匪輕與近盛行之桑葉黃症意亦他邑所尠。設如傷食氣阻。脈道不通。隱伏如無。臨證之際。儻不智珠在握。易滋疑訝。經云治病必求其本。此類是已。局外不察。此中難易。以爲醫者愈病亦責任所當然耳。然醫者神機默運。愈卽愒置。此治案所以流布於外者少爾。今仍師俞桂庭誥王海甯之言。診餘錄稿當仁。

不讓復續前編敝帚自珍知我者當能矜其草創而正之也

中華民國七年戊午臘月無錫周鎮小農別署伯華謹識

書喻嘉言三因白散方解後

時逸人

嗚呼此方之妙義韜晦久矣賴先生詳論之以彰其道又垂爲驗案以記其實深惜無擇之不明言以教後學其存心仁愛果如何耶孰意先生歿後此方則棄如敝屣數百年無一問之者矣僕爲此方惜不能不爲先生惜焉先生治浦君藝喘病季繼江痰病二案皆賴此方但未嘗明言其理所謂引伸觸類以躍跳於紙上以待人之自悟者耶噫先生誤矣先生天資超卓學力精銳在此道故能獨闢榛蕪深窺窔奧徵君之語誠確論也求後學之能如先生者何可多得焉即使以長沙後身自負之陳修園亦未能窺此方堂奧不過隨人顰眉夢夢然曰三因白散喻氏方解甚超而已從茲以後更無人以問津焉僕爲先生惜斯不能曲爲先生諱矣先生有知當諒

僕之苦衷也紹報丙辰十二月份張君汝偉與周炯如叔論周順翁痰飲症之治法通章皆鈔襲先生之舊語但不能識此方之精義故雖明明言之而竟背之以苦心力學之士不免千慮之失若愚蒙者尙可問乎此吾國醫學之所以難言也可惜孰甚可惜孰甚

讀診餘集書後

張汝偉

診餘集何孟河前輩余聽鴻氏所著也讀診餘集方知書之不可不讀而書之不可妄著也誠以毫厘之失千里之謬非學問經驗俱至者不可言診病非道德文章俱優者不可云著書余性喜塗鴉自專自用讀診餘集而知前日之所診者有知其然而不知其所以然矣昔日之所著者有滿紙浮言而無實質之慨矣自嗣後非痛下讀書之功研究病理之素雖有保存國學之心而終致於失敗者也章行嚴氏所謂新文學非白話可以了事而胡適之之論新生活亦云有意思之生活意思云者亦

深合宋儒理學之說也章氏列引泰西各國致富強皆由於能自新而新思想中莫不含有舊道理也故舍舊而言新新既不可得而舊亦亡矣天下事不進則退不成立則失敗萬無中立之理卽吾國當今之醫藥學一門人祇知中西並進新舊競爭時代當取長去短融合一貫而不知從舊學入手根底解決適成一不中不西不新不舊之腐敗醫學養成天演之淘汰而已蓋西醫之學注重實驗發熱而用退熱劑無汗而用出汗劑汗不止則用止汗劑其他如通便通溺等藥皆可立竿見影倚馬功成外科之割截則用麻醉劑而手術之精機械之巧誠中醫之所不若試再退一步觀方知此學猶未足多也何以言之假如傷寒之太陽發熱面赤汗多氣促手足厥冷小便清白將用西醫冰淋退熱法治之乎抑用中醫四逆回陽乎假如水不勝火腎虛脾敗之虛脹將用西醫刺腹泄水之法乎抑用中醫濟生腎氣之法乎假如冬溫咳嗽氣逆胸痛之飲邪將用止嗽斂澀之藥治之乎抑用中醫小青龍法治之

乎瘍科割截悶而死者不少誤割而成廢者尤多以商桑之法取效目前不計後患凡此諸症何能勝舉略知醫理者自能分其高下也今讀診餘集所診之病內症如貢姓之陰陽並脫日夜之藥大異趙姓之關格起死於回生某甲之脇虫運巧思於不可思議之中小兒之吞磁洞癥結於臟腑之內其所用藥亦能沉疴立起不以霸道見功中醫之法豈在西醫下耶特無人研究耳中醫理學之立亦能格物致知其功豈在理化之下不知讀古人之書學古人之學而反悔古學謂不適用於今時不亦大可慨哉己未之秋余正集醫鐸之稿將付剞劂及讀是書惶悚無地遂作書後附刊醫鐸之末所以自儆夫妄肆塗鴉亦猶如蘧伯玉之悔苦非也

眞本吳批醫門棒喝序

何廉臣

昔者吾鄉章虛谷先生精研醫學博通古今一以張長沙葉長洲爲宗古方書如傷寒金匱今方書如臨證指南專心玩索竭力表彰尊之爲後漢前清兩大醫聖可謂

得其正宗矣宜乎盛行一時享大名於粵浙之間予尤愛其論河間東垣丹溪景岳又可諸家之得失語多心得非任意率評者比足與徐洄溪醫學源流論並傳不朽而論鞠通之溫病條辨詆之溫瘟之牽混秋傷濕之穿鑿贊其辨藥性之精細瀉白散之流弊尤爲先得我心殊深欽佩雖發揮太極五行一篇夢隱譏其空談無謂道邇求遠反滋後人之惑而推厥深心實欲闡明陰陽作用生尅制化天地人合一之經旨其用心不可謂不苦其立言不可謂不高雖然學說隨時代爲轉移理法亦隨時勢爲變更縱近今談新醫學者排斥古醫學之陰陽五行爲空談立理陳腐可刪安知十年數十年後理化學益進步器械學益精通能將古醫之哲學大論一變而爲科學實驗之精言耶吾儕學識淺薄凡脈診腹診之術藥方配合之理氣候變遷與疾病之關係雖積數十年之閱歷經驗亦自愧未能億中何敢推測古醫氣化之精詣孰爲可刪孰爲可存而下精確之斷語也哉今予所最不解者坊間石印本載

王孟英加批評點校閱一過與予家原板藏本山陰田雪帆居士評點別無增減其爲市肆之冒託孟英可知至吾所藏尙有別刻一本並載吳氏翰通之眉批惜少留傳豈其板已廢耶抑爲人珍秘耶同社裘君吉生以流通古書爲職志對於越醫遺刻尤爲注意如趙晴初君之醫話稿王馥原君之醫方簡義等殘板皆爲其收藏補刻而印行之今年春章氏原刻又爲其所覓得其板卽吾所藏之別本同深忻幸惜已殘缺二十餘頁借吾藏本爲之補刻完足功旣竣予樂叙其巔末於簡端以誌善本之不亡

民國八年孟冬越醫何廉臣印巖識於臥龍山麓之宣化坊

醫藥叢書第三集序

時逸人

鳥鳴春雷鳴夏虫鳴秋風鳴冬天之於時也擇其善鳴者而假之鳴其於物也亦然金石絲竹匏土革木八者皆物之善鳴者也故其聲至今弗替諺曰凡物不得其平

卽人之爲言也必有所不得已亦猶四時八物之鳴也昌黎謂歌必有思而哭必有懷凡出口爲聲者皆弗能自己唐虞之時臯陶禹夔鳴之夏之時五子鳴之伊尹鳴殷周公鳴周孔子鳴春秋凡載於詩書六藝者皆鳴之善者也吁嗟嗚乎世態混沌也鳴以啓之人心邪慝也鳴以化之昌聖教挽狂瀾厥功偉矣唯吾醫家亦然前之鳴創者必有匡濟於時後之鳴述者必有振興其道歷代諸家之遺著前輝後映具在燎如殆至前清末季歐化東來新舊激爭於今爲烈有識之士咸以保存國粹爲主義其鳴聲故勁而急哀而激惴惴焉以胥淪是懼紹興裘吉生先生醫藥界中善鳴者也登高一呼響應全亞醫報月出大道彌光凡好鳴之士咸願附而和之發抒其衷悃遂得以集成大觀如醫藥叢書是考醫藥叢書於民國五年冬月出第一集民國七年冬月出第二集收羅書籍有研經言吳氏醫案羅謙甫治驗案惜分陰軒醫案周氏易簡集驗方人參考知醫必辨市隱廬醫學雜著等皆爲醫藥界有俾實

用之書今者第三集叢書將出除續刻研經言吳氏醫案惜分陰軒醫案餘爲搜羅葉氏晚年醫案周氏集驗方續編張氏白喉通考等合成六種共爲一帙付之剞劂以餉閱者吾知醫學有增術自進步挽利權拯生命諸君子好鳴之功亦裘君善鳴之成績也將來續出四五集而至於十百集以抵於千萬集凡醫界之傑作囊括靡遺則活人之德寧有涯哉頂禮私衷直書簡末非敢爲序云

民國八年己未秋時逸人氏識於鑾江益人醫藥局

溫病條辨方溫疫明辨方歌括序言

時逸人

顧亭林曰君子之爲學也將以明道濟世也揚子雲曰雕虫小技壯夫不爲豈深鑒於詞章詩賦月露風雲縱極精工無裨實用者哉休寧老人謂言之可貴而足垂後世者必性命之文也經濟之文次之然處羣居飽食之餘而留神醫藥言不墮綺語之障用有當施濟之仁起沉疴益神智植弱爲壯化鬱使寬掌個人安危之柄操一

時生殺之權應如何而深造有得以期不負所託耶逸一介布衣粗知文字略識方藥率爾操觚學未達五柳之數身初逾弱冠之文視昔人於十載讀書十載臨症者其精粗得失有不足以道里計而同日語矣惟是自慚驚下俯首悲鳴井底地蛙碟天慣見思有所廣而或未能近年來泛讀各處醫報飽聆議論學識倍增外鑒前輩爲標準內疚祖鞭於猛著雙輪並進稍益一矣竊以醫之爲道冀愈病爲能事獲利之多寡他人之毀譽均屬末節事而無足重輕者也大江南北土濕卑汚夫至下之地春氣常在故溫濕諸症飢見厭聞治劇理煩不可無應命之策溫病條辨及瘟疫明條二書風行遍地職是故也日者盧君育和手示溫病條辨及瘟疫明辨方歌括一冊云此乃揚州某醫士所著（盧君已忘其名）現其人已故不可不表彰遺籍以揚其道使逸序其篇首且命詳加注釋以便初學之按圖索驥逸受命之下披閱一週竊以爲不可博覽羣書爲學者應盡之職務由博反約方能超出迷津奈之何欲

一篇之完善使學者便禁錮於此耶間嘗言之矣博通中外古今之典籍得以經緯萬端使臨事而不惑方醫名之無愧服膺先哲葉香巖之語不禁有五肢投地之慨洵可謂仁且達矣是書之作不過於醫林中添一駢指讀瘟疫明辨及溫病條辨者得一良伴耳雖無愧於古人已實乏乎精義倘效顰於遼東之豕奇自妄稱曰使學者但熟此帙已無遺用不必復事他求是以僅得之智籠絡無限之心思材力而入我彀中盈天下之學者相繼而入魔途也沾虛名賈實禍庸妄之罪豈堪擢髮數哉是書未涉此弊爰樂序焉

己未年夏歷三月望日江左時逸人識

全體論緒例

時逸人

醫學以吾國爲最古非他邦所能及而創之始者以理論爲最先非他書所能儔內難二書可徵也於是由理論而症治而診斷而方法而藥物傷寒金匱中藏本草脈

經玉函千金外台諸書作矣（本草雖冠神農而實爲漢人所記考古家自知）昌黎曰莫爲之先雖美弗彰莫爲之後雖盛弗傳然千百載竟相須焉豈偶然也哉吾中醫經數千百人之材力數千年之經驗精微畢備細大不捐處潮流維新之際雖萬矢之的而其中顛撲不破之真理足垂萬世而不朽故天演優勝劣敗之公例永不能淘汰之也果何修而若此吾當頌諸前輩之遺著功並長城矣雖然吾國醫學淵博固足經緯萬端而教授之不良亦無可粉飾者也如逸習中醫三年矣讀書也臨症也與道友而切磋也聽師氏之口講指畫也無非陰陽虛實五行生尅及荊芥防風之於表陳皮半夏之於痰而已餘無所聞焉嗚呼是果足爲中醫者耶噫我知之矣師承久乏教授無資井地蛇蛙何知天日終年累月所習見習聞者不過必讀條辨心悟備要集解諸書敷淺支離早爲識者所厭棄倘能備金鑑綱目準繩全書等者已寥若晨星矣遑能問內難傷寒金匱脈經玉函經千金外台諸書之名詞得見